

南無本師釋迦牟尼佛（三稱）

無上甚深微妙法 百千萬劫難遭遇
我今見聞得受持 願解如來真實義

悲華經卷第四

諸菩薩本授記品第四之二

「善男子！爾時，寶海梵志白第四王子能伽奴言，乃至發願亦復如是。

爾時，佛告阿伽那言：『善哉善哉！善男子！汝行菩薩道時以金剛慧破無量無邊眾生諸煩惱山，大作佛事，然後乃成阿耨多羅三藐三菩提。善男子！是故號汝為金剛智慧光明功德。』爾時，佛告金剛智慧光明功德菩薩：『善男子！汝於來世過一恆河沙等阿僧祇劫，入第二恆河沙等阿僧祇劫，於此東方過十恆河沙等世界中微塵數等世界，有世界名曰不眴。善男子！汝於是中當得作佛，號曰普賢如來、應供、正遍知、明行足、善逝、世間解、無上士、調御丈夫、天人師、佛、世尊。其佛世界所有莊嚴，如汝所願悉皆具足。』

善男子！寶藏如來授金剛智慧光明功德菩薩摩訶薩阿耨多羅三藐三菩提記，時虛空中有無量無邊百千億那由他天而讚歎言：『善哉善哉！』雨牛頭栴檀阿伽流香、多伽流香、多摩羅跋并及末香而以供養。爾時，金剛智慧光明功德菩薩白佛

言：『世尊！若我所願成就得已利者，我今敬禮諸佛世尊，惟願十方如恆河沙等世界滿中諸天微妙好香，眾生之類或在地獄畜生餓鬼、天上人中，若聞是香，所有身心苦惱之疾悉得遠離，如是頭面到地。』善男子！爾時，金剛智慧光明功德菩薩作是言已，即頭面禮佛。爾時十方如恆河沙等世界，周遍悉有微妙之香，眾生聞者皆得遠離身心苦惱。

爾時，寶藏如來即為金剛智慧光明功德菩薩而說偈言：
金剛慧能破 汝今可還起 十方佛世界 周遍有妙香
與無量眾生 安樂及歡喜 當來得成佛 無上世間解

善男子！爾時，金剛智慧光明功德菩薩聞是偈已，其心歡喜，即起合掌前禮佛足，去佛不遠復坐聽法。

善男子！爾時寶海梵志復白第五王子無所畏言，乃至發心亦復如是。爾時王子答梵志言：『我今所願不欲於此不淨世界成阿耨多羅三藐三菩提。願成佛時世界之中無有地獄畜生餓鬼，其地純以紺琉璃寶，廣說皆如蓮華世界所有莊嚴。』爾時無畏王子手持蓮華上寶藏佛，作如是言：『世尊！若我所願成就得已利者，以佛力故今在佛前，願我當得悉見種種莊嚴三昧。復願天雨種種蓮華大如車輪，遍滿十方如恆河沙世界微塵數等諸佛國土，亦令我等皆遙見之。』

善男子！無畏王子說是言已，以佛力故尋時即得悉見種種莊嚴三昧，天雨種種無量蓮花大如車輪，遍滿十方如恆河沙等世界微塵等諸佛國土，一切大眾皆得遙見，見是事已得歡喜樂。爾時佛告無畏王子：『善男子！乃能作是甚深微妙之大願也，取嚴淨佛土復能疾得悉見種種莊嚴三昧，願不虛故天雨如是無量蓮華。』『世尊！若我所願成就得己利者，願此諸華悉住於空不復墮落。』

時寶藏佛告無畏王子言：『善男子！汝今速疾以諸蓮華印於虛空，是故號汝為虛空印。』爾時佛告虛空印菩薩：『善男子！汝於來世過一恆河沙等阿僧祇劫，入第二恆河沙等阿僧祇劫，於東南方去此佛土百千萬億恆河沙等世界，彼有世界名曰蓮華，汝於是中當成阿耨多羅三藐三菩提，號蓮華尊如來、應供、正遍知、明行足、善逝、世間解、無上士、調御丈夫、天人師、佛、世尊。所有大眾純諸菩薩摩訶薩等其數無量不可稱計。其佛壽命無量無邊，所願具足悉皆成就。』爾時虛空印菩薩摩訶薩頭面禮於寶藏如來，即起合掌去佛不遠復坐聽法。

爾時世尊為虛空印而說偈言：

善男子當知	有人作己利	能斷煩惱結	常令得寂靜
所受持功德	數如恆河沙	世界微塵等	成就而不失
汝於當來世	成就無上道	亦如過去佛	等無有差別

善男子！虛空印菩薩聞是偈已，心生歡喜。

善男子！爾時，寶海梵志白第六王子虛空言，乃至發心亦復如是。爾時王子菴婆羅白佛言：『世尊！我今所願不欲於此不淨世界成阿耨多羅三藐三菩提，略說如虛空印所願。世尊！若我所願成就得已利者，願令十方如恆河沙等世界之中，自然而有七寶妙蓋，在上虛空羅列而住，純金為網以覆其上，七寶為鈴垂以莊嚴。其蓋寶鈴常出佛聲、法聲、比丘僧聲、六波羅蜜及六神通、十力、無畏如是等聲，世界眾生聞者尋發阿耨多羅三藐三菩提心，已發心者得不退轉。寶鈴所生佛法僧聲乃至無所畏聲，悉聞十方諸佛世界。時虛空以佛力故，乃得自聞。世尊！若我所願成就得已利者，願我今者得知日三昧，以三昧力故，增益一切諸善根本，得三昧已，惟願諸佛與我授阿耨多羅三藐三菩提記。』是時王子說是語已，以佛力故即得知日三昧。

爾時世尊讚王子言：『善哉善哉！善男子！汝所願者甚深甚深，以甚深功德因緣故，尋時十方如恆河沙等世界中，自然而有七寶妙蓋，於上虛空羅列而住，純金為網以覆其上，七寶為鈴垂以莊嚴。其鈴常出佛法僧聲乃至無所畏聲。爾時有百千億那由他眾生聞是聲已，尋發阿耨多羅三藐三菩提心，是故號汝為虛空日光明。』爾時佛告虛空日光明菩薩摩訶薩：『汝於來世當成阿耨多羅三藐三菩提，過一恆河沙阿僧祇

劫，入第二恆河沙等阿僧祇劫，東方去此二恆河沙等佛剎，有世界名曰日月，汝於是中當成阿耨多羅三藐三菩提，號法自在豐王如來、應供、正遍知、明行足、善逝、世間解、無上士、調御丈夫、天人師、佛、世尊。』爾時虛空日光明菩薩聞是記已，即禮佛足。

爾時世尊為虛空日光明而說偈言：

善男子今起 善哉自調御 以淳淑大悲 於一切眾生
度脫令斷苦 畢竟住彼岸 智慧善分別 令到無上道

善男子！爾時虛空日光明菩薩聞是偈已，其心歡喜即起合掌前禮佛足，去佛不遠復坐聽法。

爾時，寶海梵志復白第七王子善臂言，乃至發心亦復如是。爾時王子白佛言：『我今所願不欲於此不淨世界成阿耨多羅三藐三菩提，願我來世所有世界，無有地獄畜生餓鬼、女人名字及以胎生、須彌諸山大小鐵圍、山陵堆阜石沙穢惡、荊棘惡風木樹叢林、大海江河日月晝夜闇冥臭處。眾生等類無有便利涕唾污垢，身心不受諸不樂事。瑪瑙為地無諸塵土，純有百千無量珍寶而莊嚴之。無有諸草，唯有好妙曼陀羅華，種種寶樹以為校飾。其寶樹上有妙寶蓋，復有種種寶衣華鬘，諸寶瓔珞香華伎樂，諸寶器物諸寶妙華，以如是等校飾其樹。世界之中無有晝夜，以華開合而知時節。諸菩薩等在

合華中自然出生，既得生已，皆得悉見種種莊嚴三昧，以三昧力故，得見十方如微塵等諸世界中現在諸佛，於此三昧，一念之頃具足六神通。以天耳故，悉聞十方如微塵等世界現在諸佛說法音聲。以宿命智，知過去世如一佛土微塵等劫宿世之事。以天眼故，悉見十方諸佛世界種種莊嚴。以他心智故，於一念中，得知如一佛世界微塵數等世界眾生心之所念，乃至成阿耨多羅三藐三菩提，終不失是三昧。清旦之時，四方有風柔軟清淨，吹微妙香及散諸華。以風力故，諸菩薩等從三昧起，三昧起已，即得如是如意通力。以是力故，於一念頃能到十方一一方面如一佛土微塵數等諸佛世界，供養現在諸佛世尊諮受妙法，即一念中還至本土無有罣礙。諸菩薩等在曼陀羅華、摩訶曼陀羅華華臺之中結跏趺坐，思惟法門。所謂欲得見我所在方面，隨身所向悉令得見。若於深法有疑滯者，以見我故尋得除滅。若有問義欲聽法者，以見我故即得深解無有狐疑。所有菩薩深解無我及無我所，是故能捨身根命根一切，必定不退於阿耨多羅三藐三菩提。世界無有一切不善之名，亦無受戒，受戒之名、毀戒悔過。一切眾生其身皆有三十二相，得那羅延力，乃至成阿耨多羅三藐三菩提，無有一人六根毀缺不完具者。所有眾生即於生已鬚髮自落服三法衣，得善分別三昧，乃至阿耨多羅三藐三菩提終不中失。諸眾生等悉得和合一切善根，無有一人為老病所苦。若諸菩薩命終之時結跏趺坐，入於火定自燒其身。燒其身已四方清風來吹其身，舍利散在諸方無佛世界，尋時變作摩

尼寶珠，如轉輪聖王所有寶珠。若有眾生見觸之者，悉令不墮三惡道中，乃至涅槃不受諸苦，即得捨身生於他方現在佛所諮受妙法，發阿耨多羅三藐三菩提心便不退轉。所有眾生若命終時，其心在定無有散亂，不受諸苦愛別離等，命終之後不墮八難無佛之世，乃至成阿耨多羅三藐三菩提，常得見佛諮受妙法供養眾僧。一切眾生離於貪欲瞋恚愚癡、恩愛嫉妒無明憍慢。世界無有聲聞緣覺，所有大眾純諸菩薩摩訶薩等充滿其國，其心柔軟無有愛濁，堅固不退於阿耨多羅三藐三菩提得諸三昧。世界純有清淨光明，十方如微塵等諸佛世界，悉得見聞我之世界。我界所有微妙之香，悉遍十方如微塵等諸佛世界，我界眾生常得快樂，未曾聞有受苦之聲。世尊！我行菩薩道時不作齊限。我今要當莊嚴如是清淨佛土，眾生之類皆使清淨遍滿其國，然後乃成阿耨多羅三藐三菩提。

世尊！我成阿耨多羅三藐三菩提，當出無量無邊光明照於十方，如千佛剎微塵數等諸佛世界，令彼眾生悉遙見我三十二相，即時得斷貪欲瞋恚愚癡、嫉妒無明憍慢一切煩惱，發阿耨多羅三藐三菩提心，如其所求得陀羅尼三昧忍辱。以見我故，寒冰地獄所有眾生悉得溫樂，譬如菩薩入第二禪。以見我故，身心受於第一妙樂，發阿耨多羅三藐三菩提心。若其命終要當生我佛之世界，生已即得不退轉於阿耨多羅三藐三菩提，熱地獄等畜生餓鬼亦復如是。諸天所見光明一倍，令

我壽命無量無邊無能數者，除一切智。

世尊！我成阿耨多羅三藐三菩提已，令十方無量無邊阿僧祇世界現在諸佛稱讚於我，其餘眾生若得聞是稱讚我聲，願作善根速生我國，命終之後必生我國，唯除五逆、毀壞正法、誹謗聖人。

世尊！我成阿耨多羅三藐三菩提已，十方無量無邊阿僧祇世界中所有眾生，若聞我聲發願欲生我世界者，是諸眾生臨命終時，悉令見我與諸大眾前後圍遶，我於爾時入無翳三昧，以三昧力故在於其前而為說法，以聞法故尋得斷除一切苦惱，心大歡喜，其心喜故得寶寶三昧，以三昧力故令心得念及無生忍，命終之後必生我界。若餘世界諸眾生等無有七財，不欲修習行於三乘，不欲生於人天中者，亦不修行一切善根及三福處，非法行污，愛著惡欲，專行邪見，如是眾生，願我入於無煩惱三昧，以三昧力故，彼諸眾生若命終時，我與大眾而住其前為說妙法，復為示現佛土所有，又勸令發阿耨多羅三藐三菩提心。眾生聞已，即於我所心生深信歡喜安樂，尋發阿耨多羅三藐三菩提心，令彼眾生得斷苦惱。斷苦惱已便得日燈光明三昧，斷於癡闇，命終之後尋生我界。』

爾時寶藏如來讚言：『善哉善哉！汝今乃能作微妙之大願也。』

『世尊！若我所願成就得已利者，願令十方如微塵等諸佛世界，悉雨憂陀羅婆羅香，并梅檀香、牛頭梅檀香、種種末香，若有眾生在在處處聞是香者，悉發阿耨多羅三藐三菩提心。令我今者得金剛願三昧，以三昧力故，悉得遙見諸世界中所雨諸香。』

善男子！爾時王子說是言已尋得三昧，自見十方如微塵數等諸佛世界所有諸香、憂陀羅婆羅香、梅檀之香、牛頭梅檀、種種末香，及見一一方面有不可計諸眾生等，恭敬叉手發阿耨多羅三藐三菩提心。寶藏如來告王子言：『善男子！汝之所願已得成就，天雨種種諸微妙香已，有不可計眾生恭敬叉手，發阿耨多羅三藐三菩提心，是故號汝為師子香。汝於來世過一恆河沙等阿僧祇劫，入第二恆河沙等阿僧祇劫，上方去此四十二恆河沙世界微塵數等諸佛世界，有世界名青香光明無垢，汝於彼土當得成阿耨多羅三藐三菩提，號光明無垢堅香豐王如來、應供、正遍知、明行足、善逝、世間解、無上士、調御丈夫、天人師、佛、世尊。』善男子！爾時師子香菩薩禮寶藏如來，頭面著地。

爾時如來為師子香菩薩而說偈言：

天人師起	受諸供養	度脫生死	令離苦惱
斷有結縛	及諸煩惱	來世當作	天人之尊

善男子！爾時，師子香菩薩聞是偈已，心大歡喜即起合掌，去佛不遠復坐聽法。

善男子！爾時寶海梵志復白第八王子泯圖言，乃至發心亦復如是。爾時王子前白佛言：『世尊！我今所願要當於是不淨世界修菩薩道，復當修治莊嚴十千不淨世界，令其嚴淨如青香光明無垢世界。亦當教化無量菩薩，令心清淨無有垢穢皆趣大乘，悉使充滿我之世界，然後我當成阿耨多羅三藐三菩提。世尊！願我修行菩薩道時，要當勝於餘諸菩薩。世尊！我已於七歲之中端坐思惟諸佛菩薩清淨功德，及種種莊嚴佛土功德，是時即得悉見種種莊嚴三昧等萬一千菩薩三昧，增進修行。世尊！若未來諸菩薩等行菩薩道時，亦願悉得如是三昧。世尊！願我得出離三世勝幢三昧，以三昧力故，悉見十方無量無邊諸佛世界在在處處現在諸佛，出離三世為諸眾生說於正法。世尊！願我得不退三昧，以三昧力故，於一念中悉見如微塵等諸佛菩薩及諸聲聞恭敬圍遶。願我於此一佛所得無依止三昧，以三昧力故作變化身，一時遍至如一佛界微塵數等諸如來所，供養禮拜。願我一一身以種種無上珍寶華香、塗香末香、妙勝伎樂種種莊嚴供養一一諸佛。世尊！願我一一身於一一佛所，如大海水滴等劫行菩薩道。願我得一切身變化三昧，以三昧力故於一念中在一一佛前，知如一佛土微塵數等諸佛世界。世尊！願我得功德力三昧，以三

昧力故於一一佛前，遍到如一佛土微塵數等諸世尊所，以微妙讚歎讚歎諸佛。世尊！願我得不眴三昧，以三昧力故，於一念中悉見諸佛遍滿十方無量無邊世界之中。世尊！願我得無諍三昧，以三昧力故，於一念中悉見過去未來現在諸佛所有淨妙世界。世尊！願我得首楞嚴三昧，以三昧力故化作地獄之身入地獄中，與地獄眾生說微妙法，勸令發阿耨多羅三藐三菩提心。彼諸眾生聞是法已，尋發無上菩提之心，即便命終生於人中，隨所生處常得值佛，隨所值佛而得聽法，聽受法已即得住於不退轉地。乾闥婆、阿修羅、迦樓羅、緊那羅、摩睺羅伽、人、非人等，天龍鬼神、夜叉羅剎、毘舍遮、富單那、伽吒富單那、屠殺魁膾、商賈婬女、畜生餓鬼如是等眾亦復如是，皆令發阿耨多羅三藐三菩提心。有諸眾生隨所生處得諸色像，我分之身如業所作，隨受苦樂及諸工巧，願我變化作如是身，隨其所作而教化之。世尊！若有眾生各各異音，願我隨其種種音聲而為說法各令歡喜，因其歡喜勸發安止，令其不退於阿耨多羅三藐三菩提。世尊！我要當教十千佛土所有眾生，令心清淨無有行業煩惱諸毒，乃至不令一人屬於四魔，何況多也。若我莊嚴十千佛土如是清淨，如光明無垢尊香王佛青香光明無垢世界所有種種微妙莊嚴，然後我身及諸眷屬乃當如彼師子香菩薩之所願也。

『世尊！若我所願成就得己利者，當令十千諸佛世界所有眾生斷諸苦惱，得柔軟心得調伏心，各各自於四天下界，見佛

世尊現在說法。一切眾生自然而得種種珍寶、華香末香及以塗香，種種衣服種種幢幡，各各以用供養於佛，供養佛已悉發無上菩提之心。世尊！願我今者以悉得見種種莊嚴三昧力故，皆得遙見如是諸事，作是語已尋如所願悉得見之。』

爾時世尊讚阿彌具言：『善哉善哉！善男子！汝今世界周匝四面一萬佛土清淨莊嚴，於未來世復當教化無量眾生令心清淨，復當供養無量無邊諸佛世尊。善男子！以是因緣故今改汝字號為普賢，於未來世過一恆河沙等阿僧祇劫，入第二恆河沙等阿僧祇劫末後分中，於北方界去此世界過六十恆河沙等佛土，有世界名知水善淨功德，汝當於中成阿耨多羅三藐三菩提，號智剛吼自在相王如來、應供、正遍知、明行足、善逝、世間解、無上士、調御丈夫、天人師、佛、世尊。』善男子！爾時，普賢菩薩摩訶薩頭面著地禮寶藏佛。

爾時如來即為普賢菩薩而說偈言：

汝起善導師 已得如所願 善能調眾生 皆令得一心
度於煩惱河 及脫諸惡法 來世作燈明 諸天世人師

善男子！爾時，會中有十千人心生懈怠，異口同音作如是言：『世尊！我等來世即於如是嚴淨佛土成阿耨多羅三藐三菩提，所謂普賢菩薩所修清淨諸世界也。世尊！我等要當具足修六波羅蜜，以具足六波羅蜜故，各各於諸佛土成阿耨多羅

三藐三菩提。』善男子！爾時，寶藏如來即便為是十千人等授阿耨多羅三藐三菩提記：『善男子！普賢菩薩成阿耨多羅三藐三菩提時，汝等當於普賢菩薩所修清淨萬佛土中，一時成阿耨多羅三藐三菩提。有一千佛同號智熾尊音王如來、應供、正遍知、明行足、善逝、世間解、無上士、調御丈夫、天人師、佛、世尊。復有千佛同號增相尊音王，復有千佛同號善無垢尊音王，復有千佛同號離怖畏尊音王，復有千佛同號善無垢光尊音王，復有五百佛同號日音王，復有五百佛同號日藏尊王，復有五佛同號樂音尊王，復有二佛同號日光明，復有四佛同號龍自在，復有八佛同號離恐怖稱王光明，復有十佛同號離音光明，復有八佛同號音聲稱，復有十一佛同號顯露法音，復有九佛同號功德法稱王，復有二十佛同號不可思議王，復有四十佛同號寶幢光明尊王，復有一佛號覺知尊想王，復有七佛同號不可思議意，復有三佛同號智藏，復有十五佛同號智山幢，復有五十佛同號智海王，復有三十佛同號大力尊音王，復有二佛同號山功德劫，復有八十佛同號清淨智勤，復有九十佛同號尊相種王，復有百佛同號善智無垢雷音尊王，復有八十佛同號勝尊大海功德智山力王，復有四十佛同號無上菩提尊王，復有二佛同號智覺山華王，復有二佛同號功德山智覺，復有三佛同號金剛師子，復有二佛同號持戒光明，復有二佛同號示現增益，復有一佛號無量光明，復有三佛同號師子遊戲，復有二佛同號無盡智山，復有二佛同號寶光明，復有二佛同號無垢智慧，復有九佛同號智慧

光明，復有二佛同號師子稱，復有二佛同號功德遍王，復有二佛同號雨法華，復有一佛號造光明，復有一佛號增益山王，復有一佛號出法無垢王，復有一佛號香尊王，復有一佛號無垢目，復有一佛號大寶藏，復有一佛號力無障礙王，復有一佛號自知功德力，復有一佛號衣服知足，復有一佛號得自在，復有一佛號無障礙利益，復有一佛號智慧藏，復有一佛號大山王，復有一佛號曰力藏，復有一佛號求功德，復有一佛號華幢枝，復有一佛號眾光明，復有一佛號無礙功德王，復有一佛號金剛上，復有一佛號曰法相，復有一佛號尊音王，復有一佛號堅持金剛，復有一佛號珍寶自在王，復有一佛號堅自然幢，復有一佛號山劫，復有一佛號雨娛樂，復有一佛號增益善法，復有一佛號娑羅王，復有二佛同號功德遍滿大海功德王，復有一佛號智慧和合，復有一佛號智熾，復有一佛號華眾，復有一佛號世間尊，復有一佛號優曇鉢華幢，復有一佛號法幢自在王，復有一佛號梅檀王，復有一佛號善住，復有一佛號精進力，復有一佛號幢等光明，復有一佛號曰智步，復有一佛號曰海幢，復有一佛號滅法稱，復有一佛號壞魔王，復有一佛號眾光明，復有一佛號出智光明，復有一佛號曰慧燈，復有一佛號安隱王，復有一佛號曰智音，復有一佛號幢攝取，復有一佛號天金剛，復有一佛號種種莊嚴王，復有一佛號無勝智，復有一佛號善注意，復有一佛號月王，復有一佛號無勝步自在王，復有一佛號娑鄰陀王，復有八十佛同號師子步王，復有五十佛同號那羅延無勝藏，復有

七十佛同號聚集珍寶功德，復有三十佛同號光明藏，復有二十佛同號分別星宿稱王，復有二佛同號功德力娑羅王，復有九十佛同號微妙音，復有一佛號曰梵增，復有一佛號提頭賴吒王，復有千佛同號蓮華香擇稱尊王，復有六十佛同號光明熾燈王，復有三十佛同號蓮華香力增，復有二佛同號無量功德大海智增，復有一佛號閻浮陰，復有一百三佛同號功德山幢，復有一佛號師子相，復有一百一佛同號龍雷尊華光明王，復有一佛號善趣種無我甘露功德劫王，復有千佛同號離法智龍王解脫覺世界海眼山王，皆有十號如來、應供、正遍知、明行足、善逝、世間解、無上士、調御丈夫、天人師、佛、世尊。如是等佛同共一日一時，各各於諸世界成阿耨多羅三藐三菩提，壽命各十中劫，卿等涅槃亦同一日，般涅槃已，所有正法七日即滅。』善男子！爾時十千人向寶藏佛頭面作禮。

爾時世尊為十千人而說偈言：

龍王汝起 堅固自在 無上善願 清淨和合
卿等用意 疾如猛風 精勤修學 六波羅蜜
來世必成 天人之尊

善男子！爾時十千人聞是偈已心生歡喜，即起合掌前禮佛足，去佛不遠復坐聽法。

善男子！爾時，寶海梵志復白第九王子蜜蘇言，乃至發心亦復如是。爾時王子前白佛言：『世尊！我行菩薩道時，願十方如恆河沙等世界所有現在諸佛為我作證，今於佛前發阿耨多羅三藐三菩提心。世尊！願我行菩薩道時乃至成佛於其中間不生悔心，乃至成佛常住一心無有退轉，如說而行如行而說，乃至無有一人來惱我心。更不求於聲聞緣覺，不起婬欲惡想之心，其心不與睡眠憍慢疑悔等共，亦復不生貪婬殺盜妄語兩舌、惡口綺語貪恚邪見、嫉妒慢法欺誑之心，我修菩薩道乃至成阿耨多羅三藐三菩提，中間不生如是等法。乃至成阿耨多羅三藐三菩提，行時步步心心數法常念諸佛，得見諸佛諮受妙法供養眾僧。於諸生處常願出家，當出家時即得成就糞掃三衣。常在樹下獨坐思惟，住阿蘭若常行乞食，不求利養行於知足。常講說法成就無量無障礙辯，不犯大罪。不以我相為女人說法，若說法時恆以空相，其心常念空無之法，拱手端坐亦不露齒。若有學習大乘之人，而於其所起世尊想恭敬供養，所聞法處亦起佛想，於諸沙門婆羅門中故生恭敬供養尊重，除佛世尊。於諸眾中不生分別此是福田、此非福田而行布施，願我不於法施人所生嫉妒心。若有眾生應被刑戮，願我捨命以救護之。若有眾生犯於諸罪，願我以力言說錢財而拔濟之，令得解脫。若有在家出家之人有諸罪過，願不發露顯現於人。於諸利養名譽等中而常遠離，如避火坑刀劍毒樹。世尊！若我此願乃至成阿耨多羅三藐三菩提已，悉得成就如今佛前之所願者，令我兩手自然而有千輻天輪

，所得光明如火猛焰。』善男子！是時王子說是語已，其兩手中即尋各有一千輻輪，如說而得。

『世尊！若我所願成就逮得己利，成阿耨多羅三藐三菩提者，我今遣此千輻天輪，至於無佛五濁世界。是輪當作如是大聲遍滿佛土，如難陀龍王、優波難陀龍王作大音聲遍滿世界，其輪音聲亦復如是，所謂菩薩授記音聲、不失專念智慧之聲、修學空法諸佛所有法藏之聲，若有眾生在在處處聞是法聲，即時得斷貪欲瞋恚愚癡、憍慢慳吝嫉妒，而得寂靜思惟諸佛甚深智慧，發阿耨多羅三藐三菩提心。』善男子！爾時王子即遣二輪，譬如諸佛神足捷疾，其輪去疾亦復如是，遍至十方無佛惡世，為諸眾生出諸菩薩授記音聲、不失專念智慧之聲、修學空法諸佛所有法藏之聲，在在處處諸眾生等聞是法音，即便得斷貪欲瞋恚愚癡、憍慢慳吝嫉妒，而得寂靜思惟諸佛甚深智慧，發阿耨多羅三藐三菩提心，其輪須臾還來在此王子前住。

善男子！爾時寶藏如來讚王子言：『善哉善哉！善男子！汝行菩薩道所發善願無上最妙，遣此天輪至於無佛五濁之世，令無量無邊阿僧祇億百千眾生，安止住於無穢濁心，心無惱害，勸化發阿耨多羅三藐三菩提。以是故今改汝名為阿闍，於未來世當為世尊，汝今當於佛前如心所喜，願取種種莊嚴佛土。』

爾時阿闍白佛言：『世尊！我今所願如是種種莊嚴佛土，令我世界純金為地地平如掌，多有種種諸天妙寶遍滿其國，無有山陵堆阜、土沙礫石荊棘之屬，其地柔軟譬如天衣，行時足下陷入四寸舉足還復。無有地獄畜生餓鬼不淨臭穢，純有諸天微妙上香及曼陀羅、摩訶曼陀羅華遍滿其國。所有眾生無有老病，各各自在不相畏怖，常不惱他命不中夭。臨捨命時心不悔恨，其心決定無有錯亂，繫念思惟諸佛如來。若命終已不墮惡道，不生無佛五濁惡世，乃至成阿耨多羅三藐三菩提，常得見佛諮受妙法供養眾僧。所有眾生薄婬怒癡，皆行十善。世界無有種種工巧，無有犯罪及犯罪名，亦無天魔諸留難事，眾生受形無有惡色，亦不分別尊卑高下。一切眾生深解無我及無我所，聲聞、菩薩乃至夢中不失不淨。眾生常樂求法聽法，無有一人生於倒見，亦無外道。眾生無有身心疲極，皆得五通無有飢渴諸苦惱事，隨所喜樂種種食飲，即有寶器自然在手，有種種食猶如欲界所有諸天。無有洩唾便利之患痰癢汗淚，亦無寒熱。常有柔軟香風觸身，此風香氣微妙具足，薰諸天人不須餘香，如是香風隨諸天人所求冷暖，皆使滿足。又復有求優鉢羅華香風，又復有求優陀娑羅香風，有求沉水香風，有求多伽羅香風，有求阿伽羅香風，有求種種香風，如所希望於發心時皆得成就，除五濁世。願我國土有七寶樓，其寶樓中敷七寶床，茵蓐丹枕細滑柔軟猶如天衣，眾生處此寶樓床榻皆悉歡樂。其樓四邊有好池水，

其水具足有八功德，眾生隨意而取用之。其國多有金多羅樹，種種華果妙香具足，上妙寶衣種種寶蓋，真珠瓔珞而以莊嚴。諸眾生等隨意所喜，妙寶衣服即於樹上自恣取著，華果香等亦復如是。

世尊！願我菩提之樹純是七寶高千由旬，樹莖周匝滿一由旬，枝葉縱廣滿千由旬。常有微風吹菩提樹，其樹則出六波羅蜜、根力覺道微妙之聲，若有眾生聞此妙聲，一切皆得離於欲心。所有女人成就一切諸妙功德，猶如兜率天上天女，無有婦人諸不淨事，兩舌慳吝嫉妒覆心，不與男子漏心交通。若諸男子發姪欲心，至女人所以愛心視，須臾之間便得離欲，心自厭離即便還去，尋得清淨無垢三昧，以三昧力故於諸魔縛而得解脫，更不復生惡欲之心。如是女人若見男子，有愛欲心便得妊身，亦得離於姪欲之想。當妊身時若懷男女，身心無有諸苦惱事，常受快樂如忉利天人身心所受上妙快樂。女人懷妊七日七夜，所受快樂亦復如是，亦如比丘入第二禪，處胎男女不為一切不淨所污，滿足七日即便出生。當其生時受諸快樂有微妙香，女人產時亦無諸苦，如是母子俱共入水洗浴其身，是時女人得如是念，以念力故尋得離欲清淨三昧，以三昧力故其心常定，於諸魔縛而得解脫。若有眾生宿業成就，應無量億世作女人身，以定力故得離女身乃至涅槃，一切女業永滅無餘更不復受。或有眾生宿業成就，於無量億劫應處胞胎受苦惱者，願我成阿耨多羅三藐三菩提已，

聞我名字即生歡喜，生歡喜已尋便命終，處胎即生我之世界。尋於生已所受胎分永盡無餘，乃至成阿耨多羅三藐三菩提更不受胎。或有眾生多善根者，尋便得來至我世界蓮華中生。或有眾生少善根者，要當處胎，或受女人而生我界，然後乃得永盡胎分。所有眾生一向純受微妙快樂，微風吹此金多羅樹出微妙聲，所謂苦空無我無常等聲，聞是聲者皆得光明三昧，以三昧力故得諸空定甚深三昧，世界無有姪欲想聲。

世尊！我坐菩提樹下，於一念中成阿耨多羅三藐三菩提已，願我世界無有日月光明晝夜差別，除華開合。我成阿耨多羅三藐三菩提已，當以光明遍照三千大千世界，以光明力故，令諸眾生悉得天眼，以天眼故，得見十方無量無邊諸佛世界在在處處諸佛世尊現在說法。世尊！我成阿耨多羅三藐三菩提已，說於正法令此音聲遍滿三千大千世界，眾生聞者得念佛三昧。眾生或有行住迴轉，隨所方面常得見我，若於諸法有疑滯處，以見我故即得斷疑。世尊！我成阿耨多羅三藐三菩提已，十方無量無邊阿僧祇諸佛世界在在處處所有眾生，若學聲聞，若學緣覺，若學大乘，聞我名者命終要來生我世界。學聲聞人聞我法者，得八解脫阿羅漢果。學大乘人聞我法者，得深法忍陀羅尼門及諸三昧，不退轉於阿耨多羅三藐三菩提，得無量聲聞以為眷屬，其數無邊無能數者，唯除諸佛。世尊！我得阿耨多羅三藐三菩提，隨所至方舉下足處，即有千葉金蓮華生，其華微妙有大光明，我當遣至無佛之處

稱讚我名。若有眾生於此華中得聞稱讚我名字者，尋生歡喜種諸善根欲生我國，願命終時悉皆來生。我諸大眾出家之人遠離諂曲妒嫉姦欺沙門之垢，尊重於法，於諸所須名稱利養心不貴重，常樂苦空無常無我，常勤精進尊法依僧。若諸菩薩得不退者皆悉令得龍雨三昧，以三昧力故為眾生說般若波羅蜜，令離生死乃至成佛，於其中間所可說法不忘不失。世尊！我成佛已壽命住世十千大劫，般涅槃後正法住世滿一千劫。』

爾時如來讚阿闍言：『善哉善哉！善男子！汝今已取清淨世界，汝於來世過一恆河沙等阿僧祇劫，入第二恆河沙等阿僧祇劫，東方去此千佛世界，彼有世界名曰妙樂，所有莊嚴如汝所願皆悉具足，汝於是中當成阿耨多羅三藐三菩提，猶號阿闍如來、應供、正遍知、明行足、善逝、世間解、無上士、調御丈夫、天人師、佛、世尊。』

爾時阿闍菩薩白佛言：『世尊！若我所願成就得已利者，一切世間陰界諸入所攝眾生皆得慈心，無怨賊想及諸穢濁，身心快樂，猶如十住諸菩薩等處蓮華上結跏趺坐三昧正受，以三昧力令心無垢，是諸眾生身心快樂亦復如是。我今頭面敬禮於佛，唯願此地有金色光。』

善男子！爾時阿闍菩薩尋以頭面敬禮佛足，是時一切無量眾

生，身心即得受大快樂，其地亦有金色光明。

爾時寶藏如來為阿闍菩薩而說偈言：

尊意且起 汝今以令 一切眾生 心無忿怒
復於眾生 生大悲心 兩手各得 天千輻輪
淨意當來 為天人尊

善男子！爾時，阿闍菩薩聞是偈已心大歡喜，即起合掌前禮佛足，去佛不遠復坐聽法。」

悲華經卷第四

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉
俱住俱住 摩囉摩囉 虎囉 吽 賀賀
蘇怛拏 吽 潑抹拏 娑婆訶（三遍）

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國